

Suami isteri tuai hasil

Serdang: Pengorbanan berulang menghadiri kuliah selepas tamat waktu bekerja selama empat tahun, nyata berbaloi buat sepasang suami isteri apabila akhirnya berjaya menggengam ijazah masing-masing pada Majlis Konvokesyen Universiti Putra Malaysia (UPM) ke-38 di sini, semalam.

Bagi Amirah Adnan, 30, dan suaminya Muklis Ahmad, 29, yang bergelar graduan Sarjana Muda Perakauan detik itu tambah bermakna apabila Amirah kini sedang mengandung lima bulan, anak mereka yang pertama.

Menurut Amirah, tiada apa

yang dapat menggambarkan perasaan mereka saat itu selepas berdepan pelbagai cabaran sepanjang pengajian empat tahun itu.

“Niat untuk sambung belajar memang sudah lama, tetapi saya terpaksa bagi laluan kepada adik-adik di bawah timba ilmu dulu berikutan keluarga kami tidak berkemampuan.

“Selepas mendapat pekerjaan di syarikat swasta, saya teruskan hasrat menyambung pengajian di sini di mana setiap hari selepas tamat bekerja saya bergegas ke UPM dari 6.30 petang hingga 9.30 malam,” katanya.



AMIRAH dan suaminya, Muklis meraikan kegembiraan mereka.